

四庫全書

史部

欽定四庫全書

史部

水經注釋卷

二十九至
三十二

詳校官監察御史臣周元良

刑部郎中臣許兆椿覆勘

總校官降調編修臣倉聖脉

校對官編修臣周興岱

騰錄監生臣王宜

欽定四庫全書

水經注釋卷二十九

仁和趙一清撰

潛水 湍水 均水

粉水 白水 泚水

潛水出巴郡宕渠縣

潛水蓋漢水枝分潛出數受其稱耳今爰有大穴潛

水也焉通岡山下西南潛出謂之伏水

全氏曰伏水
劉昭補注郡

國志引蜀都賦註以為復出水一清按韻會濩依流也或作泐今漢水之分流者名蘆泐而其地又名白泐是亦復出水之義也唐置徵科巡院于白泐鎮在潛江縣界道元故單釋伏為潛也或以為

古之潛水鄭玄曰漢別為潛其穴本小水積成澤流與漢合大禹自尊漢疏通即為西漢水也故書曰沱潛既道劉澄之稱白水入潛然白水與羌水合入漢是猶漢水也縣以延熙中分巴立宕渠郡蓋古賔國也今有賔城縣有渝水夾水上下皆賔民所居漢祖入關從定三秦其人勇健好歌舞高祖愛習之今巴

渝儕是也縣西北有不曹水南逕其縣下注潛水清

按漢志巴郡宕渠縣不曹水出東北南入瀘徐谷縣有車騎將軍馮緄桂陽

太守李溫家二子之靈常以三月還鄉漢水暴長郡縣吏民莫不於水上祭之今所謂馮李也

又南入于江

庾仲雍云墊江有別江出晉壽縣即潛水也其南源

取道巴西是西漢水也

尚貢錐指曰漢志巴郡宕渠縣有潛水西南入瀘水經潛

水出巴郡宕渠縣又南入于江注與郭璞說同下文又引康成之言以為證按宕渠故域在今順慶府渠

縣界道元云宕渠水即潛水規江出南鄭縣南巴嶺謂之北水東南流逕宕渠縣謂之宕渠水又東南入于漢視謀今渠縣之渠江源出夔州府太平縣東萬頃池自南江通江二縣界西南流至合州入嘉陵江者是也此水本出山源不出於漢徧考近志其地亦無所謂大穴通岡山下者且漢志云西南入瀉瀉即禹貢之潛而此水與之合則是班固原不以此水為禹貢之潛也水經改云入江故鄴援鄴之說以立注而不知二氏所言主漢壽與宕渠無涉移彼入此舛繆殊甚且此水源出巴嶺巴嶺在南鄭縣百餘里綿亘深遠高聳千尋冬夏積雪不消包孤雲兩角米倉諸山賈耽云興元之南路通巴州中有孤雲米倉山行者必三日始達于嶺王韶之所謂孤雲兩角去天一控其峻如此禹必不以為貢道潛不在宕渠無疑矣一清按漢志潛水西南入江與水經合不云入瀉其入瀉者不曹水也東燕何以誤引而繆證之

湍水

元遺山集晚發石門渡湍水道中詩自注水經湍音專

出郟縣北芬山南流

過其縣東又南過冠軍縣東

湍水出弘農界翼望山水甚清澈東南流逕南陽郟

縣故城東史記所謂下析郟也漢武帝元封元年封

左將黃同為侯國

一清按史記是下郟侯左將軍黃同索隱曰西南夷傳甌駼將左黃

同則左是姓恐誤漢表云左將黃同則左將是官不疑又漢表是下郟侯師古曰郟音孚然表明云南陽

則郟縣是也若作孚音湍水又南菊水注之水出西則在馮翊矣亦為誤也

北石澗山芳菊谿亦言出析谷蓋谿澗之異名也源

傍悉生菊草潭潤滋液極成甘美云此谷之水土食

挹長年司空王暢太傅袁隗太尉胡廣並汲飲此水

以自綏養是以君子留心甘其臭尚矣菊水東南流

入于湍

一清按漢志弘農郡析縣黃水出黃谷鞠水出析谷俱東至鄴入湍水師古曰鞠水即今

所謂菊潭也黃水見丹水注

湍水又逕其縣東南歷冠軍縣西北

有楚竭高下相承八重周十里方塘蓄水澤潤不窮

湍水又逕冠軍縣故城東縣本穰縣之盧陽鄉宛之

臨駝聚漢武帝以霍去病功冠諸軍故立冠軍縣以

封之水西有漢太尉長史邑人張敏碑碑之西有魏征

南軍司

一清按魏晉之際軍中有軍司馬東里袞為
于禁軍司馬是也又有軍司杜預行平東將

軍領征南軍司是也胡張詹寰宇記墓墓有碑碑背
三省曰軍司軍司馬也

云白楸之棺易朽之裳銅鐵不入凡

何氏曰凡古丹
字俗本作凡誤

也器不藏嗟矣後人幸勿我傷自後古墳舊冢莫不

夷毀而是墓至元嘉初尚不見發六年大水蠻饑始

被發掘說者言初開金銀銅鐵之器朱漆雕刻之飾爛

然有二朱漆棺棺前垂竹簾隱以金釘墓不甚高而

內極寬大虛設白楸之言空負黃金之實雖意錮南山寧同壽乎湍水又逕穰縣為六門陂漢孝成之世南陽太守召信臣以建昭五年斷湍水立穰西石碣一至元始五年更開三門為六石門故號六門碣也清按建昭是元帝紀年成帝則有建始之號漢書循吏傳信臣由南陽太守遷河南太守徵為少府立碣事在元帝之世無疑故平帝元始四年祀百辟卿士有益于民者九江以召父其時信臣已卒至五年更開三門為六門碣又別是一事而道元遂言之湍水注云昔在晉世杜預繼信臣之業復六門之陂直以元始所開亦信臣之遺規則誤矣溝洫志又云宣帝時鄭宏召信臣為南陽太守宣元之世不易其

任故能成
其功業即溉穰新野昆陽三縣五千餘頃漢末毀廢

遂不修理晉太康三年鎮南將軍杜預復更開廣利
加于民今廢不修矣六門側猶有六門碑是部曲主
安陽亭侯鄧達等以太康五年立湍水又逕穰縣故
城北又東南逕魏武故城之西南是建安三年曹公
攻張繡之所築也

又東過白牛邑南

湍水自白牛邑南建武中世祖封劉嵩為侯國

一清
按章

懷後漢書注云白牛蓋湍水又東南逕安衆縣故城
鄉亭之號在鄆州東

南縣本宛之西鄉漢長沙定王子康侯丹之邑也清一

按史表丹以元朔四年封湍水東南流湟水注之水出湟陽縣西

北岐棘山東南逕湟陽縣故城西漢武帝元封四年

封路最為侯國全氏曰漢表湟陽侯最朝鮮相路人子似失其姓又云在齊地理志齊郡

無湟陽未詳其義又史表呂勝亦封湟陽索隱日縣屬南陽則漢表疑誤抑或食邑在齊耶王莽

之所謂前亭也應劭曰在湟水之陽矣縣南有二碑

碑字紊滅不可復識云是左伯豪碑湟水又東南逕

安衆縣竭而為陂謂之安衆港魏太祖破張繡於是處與荀彧書曰繡逼吾歸師迫我死地蓋于二水之間以為必涉之艱阻也涅水又東南流注于湍水又東南至新野縣東入于清

湍水至縣西北東分為鄧氏陂漢太傅鄧禹故宅其奉朝請西亭侯鄧晨故宅隔陂鄧颺謂晨宅略存焉

均水出析縣北山南流過其縣之東

寰宇記鄧州內鄉縣下云析水即水

經之均水也出析縣北南入于河謂之均口郡國縣道記析水逕析縣東今析水逕縣西蓋鄧氏之經誤矣

均水發源弘農郡之廬氏縣熊耳山山南即修陽葛

陽二縣界也

一清按魏書地形志析州修陽郡領修陽蓋陽二縣蓋葛音同通用雙峰

齊秀望若熊耳因以為名齊桓公召陵之會西望熊

耳即此山也太史公司馬遷皆嘗登之縣即析之北

鄉故言出縣北也

一清按經文是出析縣北山

均水又東南流注

逕其縣下南越南鄉縣又南流與丹水合

又南當涉都邑北南入于沔

均水南逕順陽縣西漢哀帝更為博山縣明帝復曰

順陽應劭曰縣在順水之陽今于是縣則無聞於順

水矣章帝建初四年封衛尉馬廖為侯國晉太康中

立為順陽郡縣西有石山南臨洧水洧水又南流注

于洧水謂之洧口者也

一清按通鑑釋文辨誤云孫
恂曰洧水名出析縣北山南

入洧今作均蓋洧均同音或曰均口或曰洧口後人
遂連洧均二字言之謂為洧均口高貢雖指曰洧水注

云洧水又東南逕涉都縣東北均水于此入洧謂之
均口或从水作洧韻會均字下云隋置均州取洧水
名是洧即均史承水經之誤曰洧口晉桓溫伐秦水
軍自襄陽入洧口是也或又曰洧均口齊陳顯達攻
魏馬圓軍入洧均口是也洧口及洧均故地理志謂
口自是史誤東樵猥云史承水經非矣

之有水言熊耳之山有水出焉又東南至順陽入于

沔

一清按漢志弘農郡廬氏縣下有育水南至順陽入沔育水即均水非自鄧入沔之消水也書叙指

南曰水經均州地名曰龍井今龍井之水見沔水篇育漢注中均之為育蓋可信矣

粉水出房陵縣東流過郢邑南

粉水導源房陵東流注上粉縣

一清按上粉縣不知何時所立兩漢晉宋

魏諸志皆無之豈曹氏所置而旋廢者與寰宇記房陵縣有粉城沔水篇經注均有是縣此與沮水篇之臨沮縣同一卷中之可疑者也取此水以漬粉則皓耀鮮潔有異衆

流故縣水皆取名焉

又東過穀邑南東入于沔

粉水至筑陽縣西而下注于沔水謂之粉口粉水傍
有文將軍冢墓隧前有石虎石柱甚修麗閭丘羨之
為南陽葬婦墓側將平其域夕忽夢文謙止羨之不
從後羨之為楊佺期所害論者以為文將軍之崇也
白水出朝陽縣西東流過其縣南

王莽更之為厲信縣應劭曰縣在朝水之陽今朝水
逕其北而不出其南也蓋邑郭淪移川渠改狀故名

舊傳遺稱在今也

又東至新野縣南東入于洧

泚水出泚陽東北大胡山東南流逕其縣南泄水從南

來注之

一清按泚陽漢志續志皆作比陽誤也應劭曰比水東入蔡或是傳寫之訛後漢書光武紀與

甄阜梁丘賜戰于比水西章懷注云泚水在今唐州泚陽縣南廬江渦縣亦有泚水與此別也泚音比竟作泚字矣
大非

大胡山在泚陽北如東三十餘里廣員五六十里張

衡賦南都所謂天封大胡者也

一清按太平御覽引注文作大狐又云胡

一作狐南陽圖經云山有大石如應劭曰泚水出泚
孤范史樊英傳作壺山音同通用

陽縣東入蔡經云泄水從南來注之然泚陽無泄水
蓋誤引壽春之泚泄耳余以延昌四年蒙除東荊州刺
史州治泚陽縣故城城南有蔡水出南磐石山故亦
曰磐石川西北流注于泚非泄水也呂氏春秋曰齊
合章子與韓魏攻荊荆使唐蔑應之夾泚而軍欲視
水之深淺荆人射之而莫知也有菑者曰兵盛則水
淺矣章子夜襲之斬蔑於是水之上也泚水又西澳

水注之水北出茈丘山東流屈而南轉又南入于泚
水按山海經云澳水又北入視不注泚水余按呂忱
字林及難字爾雅並言灤水在泚陽脈其川流所會
諺其水土津注宜是灤水音藥 一清按二 泚水又西

字注中注

南歷長岡舊月城北泚水右會馮仁陂水水出濼陰
北山泉流競湊水積成湖蓋地百頃謂之馮仁陂陂
水歷其縣下西南竭之以溉田疇公私引裂水流遂
斷故瀆尚存泚水又南逕會口與赭水枝津合泚水

又南與澧水會澧水源出于桐柏山與淮同源而別
流西注故亦謂水為派水澧水西北流逕平氏縣故

城東北王莽更名其縣曰平善城內有南陽都鄉正

衛彈勸碑

一清按金石錄作街彈碑詳見三十一卷澧水注衛為碑下

澧水又西

北合洩水水出湖南北山

一清按疑有誤文抑亦是
大胡之南也山南曰陽水

北曰陽即湖
陽之北山也

西流北屈逕平氏城西而北入澧水澧

水又西注泚水泚水自下亦通謂之為派水昔漢光

武破甄阜梁丘賜于泚水西斬之於斯水也泚水又

南趙澧二渠出焉泚水又西南流謝水注之水出謝
城北其源微小至城漸大城周迴側水申伯之都也
詩所謂申伯番番既入于謝者也世祖建武十三年
封樊重少子丹為謝陽侯即其國也然則是水即謝
水也高岸下深浚流徐平時人目之為渟潛水城戍
又以渟潛為目非也其城之西舊棘陽縣治故亦謂
之棘陽城也謝水又東南逕新都縣左注泚水又西
南流逕新都縣故城西王莽更之曰新林郡國志以

為新野之東鄉故新都者也

又西至新野縣南入于清

泚水于岡南

全氏曰不知是何岡失其名

西南流戍在岡上泚水

又西南與南長坂門二水合

一清按坂門水即下板橋水也未知水有二名

也抑誤字也

其水東北出湖陽東隆山山之西側有漢日

南太守胡著碑子珍騎都尉尚湖陽長公主即光武

之伯姊也廟堂皆以青石為階陛廟北有石室珍之

元孫桂陽太守瑒以延熹四年遭母憂于墓次立石

祠勒銘于梁石宇傾頽而梁宇無毀盛宏之以為樊
重之母畏雷室蓋傳疑之謬也隆山南有一小山山
坂有兩石虎相對夾隧道雖處蠻荒全無破毀作制
甚工信為妙矣世人因謂之為石虎山其水西南流
逕湖陽縣故城南地理志曰故彥國也竹書紀年曰
楚共王會宋平公于湖陽者矣東城中有二碑似是
樊重碑悉載故吏人名司馬彪曰仲山甫封于樊因
氏國焉爰自宅陽徙居湖陽能治田殖至三百頃廣

起廬舍高樓連閣陂渠灌注竹木成林六畜放牧魚

羸梨果檀棘桑麻閉門成市兵弩器械費至百萬其

興工造作為無窮之功巧不可言富擬封君世祖之

少數歸外氏及之長安受業齋送甚至世祖即位追

爵敬侯詔湖陽為重立廟置吏奉祠巡祠章陵常幸

重墓

一清按范史樊宏傳父重字君雲世善農稼好
貨殖王莽末義兵起宏與宗家親屬作營壘自

守老弱歸之
者千餘家

其水四周城溉城之東南有都令樊萌

中常侍樊安碑

一清按隸釋漢故中常侍騎都尉樊
君之碑君諱安字子仲南陽湖陽人

也延熹三年冬城
南有數碑無字又有石廟數間依
十有一月勒石

于墓側棟宇崩毀惟石壁而已亦不知誰之冑族矣

其水南入太湖湖陽之名縣藉茲而納稱也湖水西

南流又與湖陽諸陂散水合謂之板橋水又西南與

醴渠合又有趙渠注之二水上承派水南逕新都縣

故城東兩瀆雙引南合板橋水板橋水又西南與南

長水會水上承唐子襄鄉諸陂散流也唐子陂在唐

子山西南有唐子亭漢光武自新野屠唐子鄉殺湖

陽尉于是地陂水清深光武後以為神淵西南流于
新野縣與板橋水合西南注於泚水又西南流注于
泚水也

水經注釋卷二十九

欽定四庫全書

水經注釋卷三十

仁和趙一清撰

淮水

淮水出南陽平氏縣胎簪山東北過桐柏山

山海經曰淮出餘山在朝陽東義鄉西尚書導淮自桐柏地理志曰南陽平氏縣王莽之平善也風俗通曰南陽平氏縣桐柏大復山在東南淮水所出也淮

均也春秋說題辭曰淮者均其勢也釋名曰淮韋也

韋繞揚州北界東至于海也爾雅曰淮為潏然淮水

與醴水同源俱導西流為醴東流為淮自

一清按下有脫文

潛流地下三十許里東出桐柏之大復山南謂之陽

口水南即復陽縣也闕駟言復陽縣湖陽之樂鄉也

元帝元延二年置在桐柏大復山之陽故曰復陽也

東觀漢紀曰朱祐少孤歸外家復陽劉氏山南有淮

源廟廟前有碑是南陽郭苞立又二碑並是漢延熹

中守令所造文辭鄙拙殆不可觀

集古錄曰桐柏廟碑磨滅雖不甚而

文字斷續粗可考次蓋南陽太守修廟碑也其辭云延熹六年正月乙酉南陽太守中山盧奴君奴下正

闕一字當是其姓其後有頌亦可讀第不見太守姓名然不著他事惟修廟祀神爾朱氏彝尊曰碑云盧奴張君特未詳其名碑甚完好疑為後人所重摹一清按其一碑見隸釋第二卷即道元所謂文辭鄙拙殆不可觀者也故經云東北過桐柏也淮水又東逕義陽縣

縣南對固成山山有水注流數丈洪濤灌山遂成巨

井謂之石泉水北流注于淮淮水又逕義陽縣故城

南義陽郡治也世謂之白茅城其城圓而不方闕駟

言晉太始中割南陽東鄙之安昌平林平氏義陽四縣置義陽郡于安昌城又太康記晉書地道記並有義陽郡以南陽屬縣為名漢武帝元狩四年封北地都尉衛山為侯國也有九渡水注之水出雞翅山磳澗潛委沿溯九渡矣其猶零陽之九渡故亦謂之為九渡焉於溪之東山有一水發自山椒下數大素湍直注頽波委壑可數百丈望之若霏幅練矣下注九渡水九渡水又北流注于淮

東過江夏平春縣北

淮水又東油水注之水出縣西南油溪東北流逕平
春縣故城南漢章帝建初四年封子全為王國淮水
又東逕曲岸北有一土穴徑尺泉流下注浴波三丈
入于油水亂流南屈又東北注于淮淮水又東北逕
成陽縣故城南漢高帝十二年封定侯奚意為侯國
王莽之新利也魏成陽郡治淮水又東北與大木水
合水西出大木山山即晉車騎將軍祖逖自陳留將

家避難所居也其水東逕成陽縣北而東入于淮淮
水又東北流左會湖水傍川西南出窮溪得其源也
淮水又東逕安陽縣故城南江國也羗姓矣今其地

有江亭春秋文公四年楚人滅江秦伯降服出次曰

同盟滅雖不能救敢不矜乎地理志曰漢乃縣之清

按今漢志無此文 呂后八年封淮南厲王子劉勃為侯國 朱氏

謀埠箋曰孫云按 史表文帝八年封 王莽之均夏也淮水又東得瀨口

水源南出大潰山東北流翼帶三川亂流北注瀨水

又北逕賢首山西又北出東南屈逕仁順城南故義

陽郡治分南陽置也晉太始初以封安平獻王字長

子望本治在石城山上因梁希

一清按希字疑誤

侵逼徙治

此城齊司州刺史馬鮮卑不守魏置郢州也

一清按通鑑梁

天監四年魏人間蔡道恭卒攻義陽益急上遣寧朔將軍馬仙琕救義陽元英縱兵擊之仙琕大敗而還

蔡靈恩勢窮降于魏魏置郢州于義陽梁書本傳天監四年仙琕遷南義陽太守封合涇縣伯仍督司州

諸軍事正指此事注云馬鮮卑不守傳寫之誤也抑南北流丈之訛也又齊字亦誤當作梁

昔常

珍竒自懸瓠道三千騎援義陽行事龐定光屯于渚

水者也。澗水東南流，歷金山北山，無樹木，峻峭層峙。
澗水又東，逕義陽縣故城。北城在山上，因倚陵，嶺周
迴三里，是郡昔所舊治。城南一十五步對門，有天
井，周一百餘步，深一丈。東逕鍾武縣故城。南本江夏
之屬縣也。王莽之當利縣矣。又東逕石城山北山，甚
高峻。史記曰：魏攻冥阨，音義曰：冥阨，或言在鄆縣箱
山也。按呂氏春秋九塞其一也。澗水逕鄆縣故城南。
建武中，世祖封鄆邯為鄆侯。蘇林曰：音盲。
全氏曰：五字注中注。

澗水又東逕七井岡南又東北注于淮淮水又東至
谷口谷水南出鮮金山北流瑟水注之水出西南具
山東北逕光淹城東而北逕青山東羅山西俗謂之
仙居水北流注于谷水谷水東北入于淮

又東過新息縣南

淮水東逕故息城南春秋左傳隱公十一年鄭息有
違言息侯伐鄭鄭伯敗之者也淮水又東逕浮光山
北亦曰扶光山即戈陽山也出名玉及黑石堪為碁

其山俯映長淮每有光輝淮水又東逕新息縣故城南應劭曰息後徙東故加新也王莽之新德也先武十九年封馬援為侯國外城北門內有新息長賈彪之廟廟前有碑面南又有魏汝南太守程曉碑魏太和中蠻田益宋效誠立東豫州以益宗為刺史淮水又東合慎水水出慎陽縣西而東逕慎陽縣故城南縣取名焉漢高帝十一年封縻說為侯國賴陰劉陶為縣長政化大行道不捨遺以病去官童謠歌

曰愷然不樂思我劉君何時復來安此下民見思如
此應劭曰慎水所出東北入淮慎水又東流積為焦
陂陂水又東南流為上慎陂又東為中慎陂又東南
為下慎陂皆與鴻却陂水散流下陂首受淮川左結
鴻陂漢成帝時翟方進奏毀之建武中汝南太守鄧
晨欲修復之知許偉君曉知水脉召與議之偉君言
成帝用方進言毀之尋而夢上天天帝怒曰何故敗
我濯子淵

一清按後漢書許
揚傳作濯龍淵

是後民失其利時有童

謠曰敗我陂崔子威及子覆

一清按後漢書作反于覆水經多引異文可並

存陂當復明府興復廢業童謠之言將有徵矣遂署

都水掾起塘四百餘里百姓得其利陂水散流下合

慎水而東南逕息城北又東南流入淮謂之慎口淮

水又東與申陂水合水上承申陂於新息縣北東南

流分為二水一水逕深丘西又屈逕其南南派為蓮

湖水南流注于淮淮水又左迤流結兩湖謂之東西

蓮湖矣淮水又東右合壑水水出白沙山東北逕柴

亭西俗謂之柴水又東北流與潭漢水合水發潭谷
東北流右會柴水柴水又東逕黃城西故弋陽縣也
城內有二城西即黃城也柴水又東北入于淮謂之
柴口也淮水又東北申陂枝水注之水首受陂水於
深丘北東逕釣臺南臺在水曲之中臺北有琴臺又
東逕陽亭南東南合淮淮水又東逕淮陰亭北又東
逕白城南楚白公勝之邑也又東北去白亭一十里
淮水又東逕長陵戍南又東青陂水注之分青陂東

瀆東南逕白亭西又南於長陵戍東東南入于淮淮

水又東北合黃水水出黃武山東北流木陵闕水注

之

全氏曰按木陵即左傳之穆陵南史俱作木

水導源木陵山西北流注

於黃水黃水又東逕晉西陽城南又東逕南光城南

光郡治又東北逕高城南故弦高國也

全氏曰弦高是鄭商安得

有國且非鄭地也將無誤記注黃道柏之烟而妄系以名

又東北逕弋陽郡東有

虞丘郭南有子胥廟黃水又東北入于淮謂之黃口

淮水又東北逕褒信縣故城南而東流注之者也

又東過期思縣北

縣故蔣國周公之後也春秋文公十年楚王田于孟

諸期思公復遂為右司馬楚滅之以為縣

全氏曰道元似以期思公

即蔣君之後而楚滅之誤也

是蓋楚之縣尹故稱公耳 漢高帝十二年以封賁

赫為侯國城之西北隅有楚相孫叔敖廟廟前有碑

一清按隸釋楚相孫叔敖碑云楚相孫君諱饒字叔

教本是縣人也六國時期思屬楚碑以漢延熹二年

五月廿八日立及碑陰集古錄云孫叔敖碑云名饒

字叔教而史記不著其名見于他書者亦皆曰叔教

而已徵斯碑後世遂不復知其名饒也洪适曰碑在

今光州延熹二年固始今段光為叔教作廟所立左

氏傳薦叔薦艾胤杜預皆以為叔教它書但云孫叔
教此碑獨言其名饒未知何據劉昌詩蘆浦筆記云
楚相孫君碑不見書撰人名字攷史記本傳列于循
史之首獨載改幣高相事為詳而碑則略之埋蛇陰
德僅書于劉向新序屬子云云則在優孟傳然其文
意皆不同碑謂生于季末任于靈王則繆矣且莊之
後為共為康為邾教歷三世凡五十年始為靈安得
任于靈卒後數年而莊復封其子耶六一先生跋喜
其得叔教之名兼以集錄二十年求之博且勤乃得
之故不暇訂正耳續金石錄云碑文可議者三如云
叔教為相庶人有曾閔曾孝之行又云繼伍舉子丈
之統又云任于靈王卒後數年莊王封之夫叔教相
楚當魯宣公時曾閔在定哀之際援後贊前猶作文
者比擬之病至伍舉後于教四五十年直云繼其統
何耶况靈王為莊王之曾孫反序在前非繆極矣彼
行云名饒未必有所據也毛奇齡經問曰張燧問淮

安闞氏謂孫叔敖卽宣十一年楚之令尹為艾獵也
艾獵楚公族卽蒍賈之子並非處士起家為楚莊所
舉用者此可信與曰孫叔敖自是處士几荀子呂覽
史記以及劉向說苑新序列女傳皆明載其人趙岐
舊註原是有據史記孫叔敖傳謂叔敖楚之處士虞
丘相蒍于王而代為楚相未詳為何所人也唯荀子
呂覽皆有孫叔敖為期思之鄙人語考期思本蒍國
地卽春秋寢丘也漢名寢縣東漢名固始楚子于宣
八年滅蒍而宣十二年卽有孫叔敖之名見于策書
則以蒍名期思必蒍滅而後期思之鄙人始得用虞
丘之蒍而舉為令尹若云楚公族其誤始于杜預服
虔之註左傳而孔氏正義不能辨正左傳宣十一年
有令尹蒍艾獵城沂事其明年晉楚戰泌又有令尹
孫叔敖不欲戰事以為兩年相拒不甚遠而只此令
尹必屬一人而不知隔歲易官在列國多有之左氏
既曰令尹孫叔敖不欲又曰若事得捷則孫叔敖為無

謀矣一稱教名一稱叔字是必字孫氏叔而教其名與蒞賈之子明喬兩人乃其所大誤者則以戰邲時隨武子稱有蒞教而杜預以為卽蒞稱也其時蒞教不在軍楚制有令尹太宰二官令尹極尊太宰極卑孫叔令尹豈得與蒞教太宰合作一人也又章懷後漢書註引皇覽曰楚大夫子思冢在當塗縣東山鄉西去縣四十里子思造芍陂子思似是孫叔教之字然則非名饒字叔教矣

淮水又東北

淠水注之水出弋陽縣南垂山西北流歷陰山關逕

二城間舊有賊難軍所頓防西北出山又東北流逕

新城戍東又東北得詔虞水口西北去弋陽虞丘郭

二十五里水出南山東北流逕詔虞亭東而北入淠

水又東北注淮俗曰白鷺水

東過原鹿縣南汝水從西來注之

縣即春秋之鹿上也左傳僖公二十一年宋人為鹿上之盟以求諸侯於楚建武十五年世祖更封侍中執金吾鄉侯陰識為侯國者也

又東過廬江安豐縣東北決水從北來注之

廬江故淮南也漢文帝十六年別以為國應劭曰故廬子國也決水自舒蓼北注不於北來也安豐東北

注淮者窮水矣又非決水皆誤耳淮水又東谷水入
馬水上承富水東南流世謂之谷水也東逕原鹿縣
故城北城側水南谷水又東逕富陂縣故城北俗謂
之成閭亭非也地理志曰汝南郡有富陂縣建武二
年世祖改封平鄉侯王霸為富陂侯十三州志曰漢
和帝永元九年分汝陰置多陂塘以溉稻故曰富陂
縣也沈氏曰漢志續志後漢書本傳皆作波波陂字通用谷水又東於汝陰城
東南注淮淮水又東北左會潤水水首受富陂東南

流為高塘陂又東積而為陂水東注焦陵陂陂水北
出為鮑陂陂水潭漲引瀆北注汝陰四周隍墜下注
潁水焦湖東注謂之潤水逕汝陰縣東逕荆亭北而
東入於淮淮水又東北窮水入焉水出六安國安豐
縣窮谷春秋左傳楚救滿司馬沈尹戌與吳師遇于
窮谷者也川流泄注于決水之右北灌安豐之左世

謂之安豐水亦曰窮水音戎並聲相近字隨讀轉

全氏

日十字流結為陂謂之窮陂塘堰雖淪猶用不輟陂

注中注

水四分農事用康北流注于淮京相璠曰今安豐有窮水北入淮淮水又東為安豐津水南有城故安豐都尉治後立霍丘戍淮中有州俗號闕州蓋津闕所在故斯州納稱焉魏書國志有曰司馬景王征毋丘儉使鎮東將軍豫州刺史諸葛誕從安豐津先至壽春儉敗與小弟秀藏水草中安豐津都尉部民張屬斬之傳首京都即斯津也

一清按漢志六安國有安豐縣莽曰美風又有安風

縣莽曰安風亭蓋西京六安國治安風故莽改國曰安風縣曰安風亭也魏收地形志揚州有安豐郡霍

州有安豐郡治步六城方輿紀要安風城在霍丘縣西南三十里郡國志云安風侯國蓋後漢以封竇融之國都也而別有安豐縣三國魏置安豐郡治安風縣晉仍為郡治杜佑曰霍丘城北有安風津曹魏安風都尉理毋丘儉敗走安風津見殺處也或譌風為豐今注云云直是誤文

又東北至九江壽春縣西泚水洪水

全氏曰洪水當作泄水合北

流注之又東潁水從西北來流注之

淮水又東左合泚口又東逕中陽亭北為中陽渡水

流淺磧可以厲也淮水又東流與潁口會東南逕蒼

陵城北又東北流逕壽春縣故城西縣即楚考烈王

自陳徙此秦始皇立九江郡治此兼得廬江豫章之地故以九江名郡漢高帝四年為淮南國孝武元狩六年復為九江焉文穎曰史記貨殖傳曰淮以北沛陳汝南南郡為西楚彭城以東東海吳廣陵為東楚衡山九江江南豫章長沙為南楚是為三楚者也清

按孟康曰舊名江陵為南楚吳為東楚彭城為西楚師古曰孟說是淮水又北左合椒水水上承淮水東北流逕虵城南又歷其城東亦謂清水東北流注于淮水謂之清水口者也

又東過壽春縣北肥水從縣東北流注之

淮水于壽陽縣西北肥水從城西北入于淮謂之肥

口淮水又北夏肥水注之

全氏曰漢志沛郡城父縣夏肥水東南至下蔡入淮

此別是一水與九江成德之肥水無與也近志稱肥水曰東肥夏肥水曰西肥水上承沙水

於城父縣右出東南流逕城父縣故城南王莽之思

善也縣故焦夷之地春秋左傳昭公九年楚公子棄

疾遷許于夷實城父矣取州來淮北之田以益之伍

舉授許夷田杜預曰此時改城父為夷故傳實之者

也言夷田在濮水西者也然則濮水即沙水之兼稱
得夏肥之通目矣漢桓帝永壽元年封大將軍梁冀
孫桃為侯國者也

沈氏曰是
永興二年

夏肥水自縣又東逕思

善縣之故城南漢章帝章和三年分城父立夏肥水

又東為高陂又東為天淙陂

一清按天淙陂賴水注
作大淙陂字形相近

水出分為二流南為夏肥水北為雞陂夏肥水東流
左合雞水水出雞陂東為黃陂又東南流積為茅陂
又東為雞水呂氏春秋曰宋人有取道者其馬不進

投之雞水是也雞水又會夏肥水而亂流東注俱入于淮淮水又北逕山峽中謂之硤石對岸山上結二城以防津要西岸山上有馬跡世傳淮南王乘馬昇僊所在也今山之東南石上有大小馬跡一十餘所仍今存焉淮水又北逕下蔡縣故城東本州來之城也吳季札始封延陵後邑州來故曰延州來矣春秋哀公二年蔡成公自新蔡遷于州來

全氏曰是昭侯其子乃成侯也

且蔡亦無稱公者謂之下蔡也淮之東岸又有一城即下蔡

新城也二城對據翼帶淮瀆淮水東逕八公山北山
上有老子廟淮水歷潘城南置潘溪戍戍東側潘溪
吐川納淮更相引注又東逕梁城臨側淮川川左有
涓城淮水左逕為涓湖淮水又右納洛川於西曲陽
縣北水分閭溪北絕橫塘又北逕蕭亭東又北鵲甫
溪水入焉水出東鵲甫谷西北流逕鵲甫亭南西北
流注于洛水北逕西曲陽縣故城東王莽之延平亭
也應劭曰縣在淮曲之陽下邳有曲陽故是加西也

一清按漢志九江郡曲陽縣莽曰延平亭東海郡曲陽縣莽曰從平師古註兩引應劭在淮曲之陽語此是九江之曲陽續志始加西字東海之曲陽續志改隸下邳魏書地形志彭沛二郡領南陽中陽洛陽三縣南陽縣有曲陽城是也洛陽即洛澗之陽也洛澗北歷秦墟下注淮謂之

洛口經所謂淮水逕壽春縣北肥水從縣東北注者也蓋經之繆矣考川定土即實為非是曰洛澗非肥水也淮水又北逕莫耶山西山南有陰陵縣故城漢高祖五年項羽自垓下從數百騎夜馳渡淮至陰陵迷失道左陷大澤漢令騎將灌嬰以五千騎追及之

於斯縣者也按地理志王莽之陰陸也後漢九江郡治時多虎災百姓苦之南陽宋均

朱氏謀埤箋曰按謝承書南陽宗資

祖父均知宋當作宗范書作宋均為守退貪賤進忠良虎悉東渡江

又東過當塗縣北過水從西北來注之

淮水自莫耶山東北逕馬頭城北魏馬頭郡治也故

當塗縣之故城也呂氏春秋曰禹娶塗山氏女不以

私害公自辛至甲四日復往治水故江淮之俗以辛

壬癸甲為嫁娶日也禹墟在山西南縣即其地也地

理志曰當塗侯國也魏不害以圉守尉捕淮陽反者

公孫勇等漢以封之

一清按漢表當塗侯魏不害以圉守尉捕反者淮陽胡倩侯又

韓陽侯江喜以圉書夫捕反者故城父令公孫勇侯俱以征和二年十一月封此從諸表故當以班史為

是江喜褚王莽更名山聚也淮水又東北濠水注之作江德

全氏曰此尚未是鍾離之濠水乃元和志所謂西濠者也在懷遠縣界水出莫耶山之

東北溪溪水西北引瀆逕禹墟北又西流注于淮淮

水又北沙水注之經所謂蕩蕩渠也淮之西有平阿

縣故城王莽之平寧也建武十三年世祖更封耿阜

為侯國郡國志曰平阿縣有當塗山渠出于荆山之
左當塗之右奔流二山之間而揚濤北注之春秋左
傳哀公七年大夫對孟孫曰禹會諸侯于塗山執玉
帛者萬國杜預曰塗山在壽春東北非也余按國語
曰吳伐楚豫會稽獲骨馬節專車吳子使來聘且問
之客執骨而問之敢問骨何為大仲尼曰丘聞之昔
禹致羣神于會稽之山防風氏後至禹殺之其骨專
車此為大也蓋立明親承聖旨錄為實証矣又按劉

向說苑辨物王肅之叙孔子廿二世孫孔猛所出先
人書家語並出此事故塗山有會稽之名考校羣書
及方土之目疑非此矣蓋周穆之所會矣淮水于荆
山北過水自南注之又東北逕沛郡義城縣東司馬
彪曰後隸九江也

又東過鍾離縣北

世本曰鍾離羸姓也應劭曰縣故鍾離子國也楚滅
之以為縣春秋左傳所謂吳公子光伐楚拔鍾離者

也王莽之蠶富也濠水出陰陵縣之楊亭北

全氏曰此所謂

東濠者也寰宇記云出鍾離縣南濠塘山二塚相近然東濠為大

小屈有石穴不測

所窮言穴出鍾乳所未詳也濠水東北流逕其縣西

又屈而南轉東逕其城南又北歷其城東逕小城而

北流注于淮淮水又東逕夏丘縣南又東渙水西入

九里注之渙水又東南流逕雖丘縣故城南又東逕

承匡城又東逕襄邑縣故城南故宋之承匡襄牛之

地一清按漢志注應劭以陳留襄邑為春秋之襄牛師古引圖稱云襄邑宋地本承匡襄陵鄉應說誤

也道元蓋惑于仲瑗不能別也宋襄公之所葬故號襄陵矣竹書紀

年梁惠成王十七年宋景鼓衛公孫倉會齊師圍我

襄陵十八年惠成王以韓師敗諸侯師于襄陵齊侯使

楚景舍來求成公會齊宋之圍即于此也西有承匡

城春秋會于承匡者也秦始皇以承匡卑濕徙縣于

襄陵更為襄邑也王莽以為襄平也漢桓帝建和元

年封梁冀子胡狗全氏曰按胡狗即梁洧當是其小字為侯國陳留風

俗傳曰縣南有渙水故傳曰睢渙之間出文章天子

郊廟御服出焉尚書所謂厥篚織文者也禹貢雖指曰厥篚織

文疏云漢世陳留襄邑縣置服官使制作衣服是兗州綾錦美也按水經注引陳留風俗傳云云襄邑在

豫域不當引兗篚為證疏承其繆 渙水又東南逕已吾縣故城南又

東逕鄆城北春秋襄公元年經書晉韓厥帥師伐鄭

魯仲孫蔑會齊曹邾杞次于鄆杜預曰陳留襄邑縣

東南有鄆城渙水又東南逕鄆城北新城南又東南左

合明溝溝水自逢洪陂東南流謂之明溝下入渙水

又逕亳城北帝王世紀曰穀熟為南亳即湯都也十

三州志曰漢武帝分穀熟置春秋莊公十三年宋公
子御說奔于毫者也渙水東逕穀熟城南漢光武建
武二年封更始子歆為侯國又東逕楊亭北春秋左
氏傳襄公十二年楚子囊秦庶長無地伐宋師于楊
梁以報晉之取鄭也京相璠曰宋地矣睢陽東南三
十里有故陽梁城今日楊亭也俗名之曰緣城非矣
西北去梁國八十里渙水又東逕沛郡之建平縣故
城南漢昭帝元鳳元年封杜延年為侯國王莽之田

平也又東逕鄴縣故城南春秋襄公十年公會諸侯及齊世子光于鄆今其地鄆聚是也王莽之贊治矣

一清按漢志沛郡鄆縣莽曰贊治應劭曰音暖師古曰此縣本為鄆應音是也中古以來借鄆字為之耳讀皆為鄆而莽呼為贊治則此縣亦有贊音索隱以為蕭何所封邑班固泗水亭碑云文昌四友漢有蕭何序功第一受封于鄆以韻而言似非南陽之鄆又曰何封實在南陽非沛縣也說者引江統徂淮賦以為證此乃統之疏繆

不可考覈耳後說是

渙水又東南逕費亭南漢建和

元年封中常侍沛國曹騰為侯國騰字季興譙人也永初中定桓帝策封亭侯此城即其所食之邑也渙

水又東逕鉅縣故城南昔吳廣之起兵也使葛嬰下
之渙水又東苞水注之水出譙城北白汀陂陂水東
流逕鄒縣南又東逕鄆縣故城南漢景帝中元年封

周應為侯國王莽更之曰留城也音多

全氏曰二字注中注沈氏

曰漢書周繇傳景帝中元年封繇子應為鄆侯蘇林
音多寒反讀如邯鄲之鄆也史記周繇傳亦引蘇音
則但曰音多漢志引孟康之音亦曰多丁度遂造為
當何反之音以附會之觀是註則六朝本已如是不
始于小顏小司馬也又宋初曰音留蓋承六朝誤本
以莽所改之單城為留城之繆若作留音則又添一
疑網轉相迷惑
不可窮詰矣
又東逕嵇山北嵇氏故居嵇康本姓

奚會嵇人也先人自會嵇遷于譙之鉉縣改為嵇氏
取嵇字之上以為姓蓋志本也嵇氏譜曰譙有嵇山

家于其側遂以為氏縣魏黃初中文帝以鄴城父山

桑鉉置譙郡故隸譙焉

一清按晉志云魏武分沛立
譙郡宋志云魏明帝分立又

引王粲詩以證是建安中立然則武帝是也注以
為黃初蓋文帝受禪之後建立五都譙亦其一耳 邑

水東流入渙渙水又東南逕蕪縣故城南地理志曰

故蕪鄉也漢高帝破黥布於此縣舊都尉治王莽之

蕪城也水上有古石梁處遺基尚存渙水又東逕穀

陽縣右會八丈故瀆瀆上承汶水南流注于渙渙水
又東逕穀陽戍南又東南逕穀陽縣故城東北右與
解水會水上承縣西南解塘東北流逕穀陽城南即
穀水也應劭曰城在穀水之陽穀水又東北流注于
渙全氏曰先大夫贈公曰渙讀如瀝胡三省通鑑注
引地形志穀陽郡建城縣有瀝水丁度曰瀝呼外
反一作渙其音同今人
呼為澮水即瀝水也渙水又東南逕白石戍南逕

城城南汶水注之水首受蘄水於蘄縣東南流逕穀
陽縣八丈故瀆出焉又東合長直故瀆瀆上承蘄水

南會于浚浚水又東南流于浚縣故城北縣有城下

聚漢高祖破項羽所在也王莽更名其縣曰育城清

按漢志注作有成並誤也此是莽改浚縣曰育城耳師古曰浚音看是也應劭曰浚水所

出音絞經之絞也全氏曰六字注中注浚水又東南入于淮故

應劭曰浚水南入淮淮水又東至嶢石山潼水注之

水首受潼縣西南潼陂縣故臨淮郡之屬縣王莽改

曰成信矣南逕沛國夏丘縣絕靳逕夏丘縣故城西

王莽改曰歸思也又東南流逕臨潼戍西又東南至

嶺石山西南入淮淮山又東逕浮山山北對嶺石山
梁氏天監中立堰于二山之間逆天地之心乖民神
之望自然水潰淮矣淮水又東逕徐縣南歷澗水注
之水導徐城西北徐陂陂水南流絕蘄水逕歷澗水
西東南流注于淮淮水又東池水注之水出東城縣
北流逕東城縣故城南漢以數千騎追羽帥二十
八騎引東城因四隄山斬將而去即此處也史記孝
惠八年封淮南厲王子劉賜為侯國

朱氏謀瑋箋曰
按史記孝文八

年封淮南厲王子劉良為東城侯劉暘為陽周侯地理志王莽更名之曰武

城也池水又東北流歷二山間東北入于淮謂之池

口也

全氏曰按胡三省曰今招信軍盱眙縣西淮陵城臨池河池河過淮陵城西北入淮謂之池河

口淮水又東蘄水注之水首受睢水於穀熟城東北

東逕建城縣故城北漢武帝元朔四年封長沙定王

子劉拾為侯國

一清按索隱曰表在豫章道元於贛水篇已引之此誤也王莽之

多聚也

一清按漢志豫章郡建成縣莽曰多聚道元誤以沛郡之建成當之蘄水又東

南逕蘄縣縣有大澤鄉陳涉起兵于此燔火為狐鳴

處也南則浚水出焉蘄水又東南北入八大故瀆又

東南流長直故瀆出焉又東入夏丘縣東絕潼水逕

夏丘縣故城北入東南逕僮縣南又東南流入徐縣

東絕歷澗又東逕大徐縣故城南又東流注于淮淮

水又東歷客山沈氏曰盱眙山古謂之客山逕盱眙縣故城西一清

按四字胡謂本作南地理志曰都尉治漢武帝元朔元年封江

都易王子劉蒙之一清案表作劉象之此從漢表為侯國王莽更名

之曰匡武一清按漢志作武匡淮水又東逕廣陵歷淮陽城北

臨泗水岨于二水之間述征記淮陽太守治自後置
戍縣亦有時廢興也

又東北至下邳淮陰縣西泗水從西北來流注之

淮泗之會即角城也左右兩川翼夾二水決入之所
所謂泗口也

又東過淮陰縣北中瀆水出白馬湖東北注之

淮水右岸即淮陰也城西二里有公路浦昔表術向

九江將東奔表譚路出斯浦因以為名焉又東逕淮

陰縣故城北城北臨淮水漢高帝六年封韓信為侯
國王莽之嘉信也昔韓信去下鄉而釣于此處也城
東有兩冢西者即漂母冢也周廻數百步高十餘丈
昔漂母食信于淮陰信王下邳蓋投金增陵以報母
矣東一陵即信母冢也縣有中瀆水首受江于廣陵

郡之江都縣縣城臨江應劭地理風俗記曰縣為一

都之會故曰江都也縣有江水祠俗謂之伍相廟也

子胥但配食耳歲三祭與五岳同

全氏曰子胥為浙
江神今錢唐吳山

祠廟香火甚盛而大江之上杳然不知其亦主風濤之患也觀范史張禹傳及韋懷注所引水經注逸文可見故山謀之南徐州記其于廣陵之曲江亦俱以為大江而不專主浙江非盡無說也

道也昔吳將伐齊北霸中國自廣陵城東南築邗城

城下掘深溝謂之韓江亦曰邗溟溝自江東北通射

陽湖地理志所謂渠水也西北至末口入淮

一清按漢志廣

陵國江都縣渠水首受江北至射陽入湖禹貢雖指曰閭百詩四書釋地曰左傳哀九年吳城邗溝通江淮杜預明謂于邗江築城穿溝東北通射陽湖西北至末口入淮乃引江達淮與孟子排淮入江不合直至隋文帝開皇七年丁未開山陽瀆煬帝大業元年丁丑開邗溝皆自山陽至揚子入江水流與前相反

蓋孟子後凡百餘歲其言始驗若預為之兆者亦一
異事又云漢志江都渠水首受江北至射陽入湖水
經注中瀆水首受江自廣陵至山陽入淮是其水乃
自南入北非自北入南也且以邗溝既開言之孟子
云淮注江非誤然班固言渠水入湖而不言入淮頗
有分荆撰水經者乃云淮水過淮陰縣北中瀆水出
白馬湖東北注之鄰道元遂以此水直至山陽口入
淮而其說牢不可破矣竊疑高郵寶應地勢最卑若
釜底然邗溝首受江水東北流至射陽湖而止杜預
云自射陽西北至末口入淮此不過言由江入淮之
糧道耳路可通淮而水不通淮也水經殆不如地志
之確今按江淮自吳關邗溝以後水流逕通但與隋
人所開有順逆之分胡氏乃云路可通淮水不
通淮語亦有病末口今註疏本作宋口非是 自永

和中江都水斷其水上承歐陽

全氏曰胡三省曰江
淮之間地名歐陽見

于史者非一處吳喜使蕭道成留軍歐陽在淮陰界
裴邃拒長孫稚欲營歐陽則在壽春境上蕭正美為
侯景柵歐陽斷援軍在今真州界邗溝引江入埭六
之所承也而會稽郡烏程縣亦有歐陽

十里至廣陵城楚漢之間為東陽郡高祖六年為荆

國十一年為吳城即吳王濞所築也景帝四年更名

江都武帝元狩三年更曰廣陵王莽更名郡曰江平

縣曰安定城東水上有梁謂之洛橋中瀆水自廣陵

北出武廣湖東陸陽湖西二湖東西相直五里水出

其間下注樊梁湖舊道東北出至博芝射陽二湖西

北出夾耶乃至山陽矣至永和中患湖道多風陳敏

因穿樊梁湖北口下注津湖

一清按魏書蔣濟傳作精湖湖左今山陽逕

渡渡十二里方達北口直至夾耶興寧中復以津湖

多風又自湖之南口沿東岸二十里穿渠入北口自

後行者不復由湖故蔣濟三州論曰

一清按蔣子通作三州論本詩

人淮有三州之義言水淺也

淮湖紆遠水陸異路山陽不通陳敏

穿溝更鑿白馬瀨百里渡湖者也自廣陵出山陽白

馬湖逕山陽城西即射陽縣之故城也應劭曰在射

水之陽漢高祖六年封楚左令尹項鏗一清按師古曰即項伯

為侯國也王莽更之曰監淮亭世祖建武十五年封

子荆為山陽公治此十七年為王國一清按方輿紀要淮安府山陽

縣下云漢臨淮郡射陽縣地後漢屬廣陵郡晉義熙中置縣為山陽郡治以境內有山陽津而名又云山

陽瀆在淮安府城東古邗溝也其入淮處謂之末口後漢書山陽王荆光武帝子初封山陽公進爵為王

後以西羌反徙封廣陵曰廣陵思王也荆封本不在淮南郡氏蓋以廣陵地近致誤而不知山陽郡縣之

名起于典午潛丘劄記曰後漢河內郡有山陽縣又山陽郡治昌邑荆封或郡或邑不可定唯其為金鄉

之山陽或河內之山陽方以西羌有警徙居東南廣陵若如今山陽去廣陵三百里耳何取乎其徙封一

清按范史廣陵思王傳荆以飛書事顯宗遣其出止河南宮是未嘗就國也時西羌反荆不得志冀天下有變私迎能星者與之謀議帝聞之乃徙封廣陵遣之國蓋荆潛居京邸包藏禍心是以屏之遠方以絕其邪謀東京皇子皆封郡王則是金鄉之山陽浦是鄧氏言之未明遂啓後人之惑爾

城本北

中郎將庾希所鎮中瀆水又東謂之山陽浦又東入淮謂之山陽口者也

又東雨小水流注之

淮水左逕泗水國南故東海郡也徐廣史記音義曰泗水國名漢武帝元鼎三年初置都郊四年封常山

憲王子思王商為國

沈氏曰漢志云元鼎四年別為泗水國而表作二年封已自不

合是注又復參差史記漢興以來將相名臣年表商以四年封則志是而表非也又泗水郡無邳縣其都

即凌縣善地理志曰王莽更泗水郡為順水凌縣為長亦誤

生凌凌水注之水出凌縣東流逕其縣故城東而東南流注于淮是曰凌口也應劭曰凌水出縣西南入

淮即經之所謂小水者也

又東至廣陵淮浦縣入于海

禹貢錐指曰淮浦漢屬臨淮郡其故城在今淮安府

安東縣西地理志云淮水至淮陵入海註疏木訛為睢陵唯水經云至淮浦縣入海又曰淮陵故城在今盱眙

縣西八十五里此地距海甚遙淮何得于縣界入海也
淮陵乃淮陰之訛又云淮陰去海一百四五十里而志
云淮陰入海者亦猶江都去海甚遠而蒯氏道下云江
水東南至江都入海不言海陵也全氏曰東樵之言非
也地志以淮水之入海系之淮陵而以淮水所分之游
水系之淮浦水經則但言淮浦以游水即淮水也漢志
水經其實一也說者謂盱眙去海尚遠不知淮水至此
而止其東即枝分之游水故班固曰淮陵也何得改曰
淮陰乎一清按山海經海內東經淮水出餘山
餘山在朝陽東義鄉西入海淮浦北與水經應

應劭曰淮涯也蓋臨側淮瀆故受此名淮水出縣故

城東王莽更名之曰淮敬淮水於縣枝分北為游水

歷朐縣與沭合又逕朐山西山側有朐縣故城秦始皇

皇三十五年於胸縣立石海上以為秦之東門一清按漢

志云秦始皇立石海上以為東門闕古今註云闕觀也說文云門觀也蓋古象魏之制秦皇立石海上狀如宮門之闕也史記始皇紀云立石東海上胸縣界中以為秦東門楮此是無闕字崔琰述初

賦曰倚高壘以周眇兮觀秦門之將將者也東北海

中有大州謂之郁州山海經所謂郁山

一清按今本山海經作郁

州在海中者也言是山自蒼梧徙此云山上猶有南

方草木今郁州治故崔季珪之敘述初賦言郁州者

故蒼梧之山也心悅而怪之聞其上有僊士石室也

乃往觀焉見一道人獨處休休然不談不對顧非已

及也即其賦所云吾夕濟于郁州者也

一清按寰宇記海東海縣

下引水經注曰胸縣東北海中有大州謂之郁州有道者學徒十人遊于蒼梧鬱州之上數百年皆得至道其山自蒼梧徙至東海之上今猶有南方草木生焉故崔琰述初賦曰郁州者故蒼梧之山也古老傳言此島人皆先是麋家之隸今存牛欄一村舊是麋家莊牧猶拈祭之呼曰麋郎臨祭之日必著犁鞅執耕鞭又言初娶婦者必先見麋郎否則為祟此等文句今皆缺失矣

游水又北逕東海

利成縣故城之東故利鄉也漢武帝元朔四年封城

陽共王子嬰為侯國王莽更之曰流泉游水又北歷

羽山西地理志曰羽山在祝其縣東南尚書堯時曰

全氏曰時曰二字當是時咨之誤四岳得舜進十六族殛鯀于羽山

是為禘杙與離兕三苗共工同其罪故世謂之四凶

鯀既死其神化為黃龍全氏曰按晉語作黃龍章昭注云能似熊宋庠云能乃來

反汲冢晉春秋又作朱鯀若黃龍則見于山海經郭注之闡筮入于羽淵是為夏郊

三代祀之故連山易曰有崇伯鯀伏于羽山之野者

是也游水又北逕祝其縣故城西春秋經書夏公會

齊侯于夾谷左傳定公十年公及齊平會于祝其實

夾谷也版度曰地二名王莽更之曰猶亭縣之東有

夾口浦游水左逕瑯琊計斤縣故城之西

一清按計斤縣杜預

謂之計基城樂史云即左傳所謂介根城皆音之轉耳

地理志曰莒子始起于

此後徙莒有鹽官故世謂之南莒也游水又東北逕

贛榆縣北東側巨海有秦始皇碑在山上去海一百

五十步潮水至加其上三丈去則三尺所見東北傾

石長一丈八尺廣五尺厚三尺八寸一行一十二字

游水又東北逕紀鄆故城南春秋昭公十九年齊伐

莒莒子奔紀，鄭莒之婦人怨莒子之害其夫老而託訪焉，取其繯而夜絕，絕鼓譟城上人亦譟，莒共公懼啟西門而出，齊遂入紀。故紀子帛之國，穀梁傳曰：吾伯姬歸于紀者也。杜預曰：紀，鄭地，二名東海，贛榆縣東北有故紀城，卽此城也。游水東北入海，舊吳之燕休常泛巨海，憚其濤險，更沿溯是瀆，由是出地，地理志曰：游水自淮浦北入海，爾雅曰：淮別為澗，游水亦枝稱者也。

水經注釋卷三十

欽定四庫全書

水經注釋卷三十一

仁和趙一清撰

潢水

清水

瀍水

濯水

瀨水

濩水

湏水

潢水出南陽魯陽縣西之堯山

全氏曰按左傳云楚子上與晉師夾泝而軍杜

預曰泝水出魯陽縣東經襄城定陵入汝即潢水也蓋音同字異耳

堯之末孫劉累以龍食帝孔甲孔甲又求之不得累

懼而遷于魯縣立堯祠于西山謂之堯山故張衡南都賦曰奉先帝而追孝立唐祠于堯山堯山在太和川太和城東北潢水出焉張衡南都賦曰其川瀆則潢澧灤澹發源巖穴布護汗汗潏沆洋溢總括急趣箭馳風疾者也潢水又歷太和川東逕小和川又東溫泉水注之水出北山阜七源竒發炎熱特甚闕駟曰縣有湯水可以療疾矣湯側又有寒泉焉地勢不殊而炎涼異致雖隆火盛日肅若冰谷矣渾流同谿

南注潢水又東逕胡木山東流又會溫泉口水出北
山阜炎勢竒毒疴疾之徒無能澡其衝漂救養者咸
去湯十許步別池然後可入湯側有石銘云皇女湯
可以療萬疾者也故杜彥達云然如沸湯可以熟米
飲之愈百病道士清身沐浴一日三飲多少自在四
十日後身中萬病愈三蟲死學道遭難逢危終無悔
心可以牢神存志即南都賦所謂湯谷湧其後者也
然宛縣有紫山山東有一水東西十五里南北二百

步湛然沖滿無所通會冬夏長溫世亦謂之湯谷也

非魯陽及南陽之縣故也

一清按漢志宛魯陽俱屬南陽郡何以云非魯陽及

南陽之縣殊不可解郡蓋以宛有湯谷魯陽亦有之南都賦所云是宛之湯谷非魯陽之湯水西京南陽治宛而王莽更宛曰南陽故亦或有張平子廣言土直稱宛為南陽之縣也然文義特晦

地所苞明非此矣澁水又東房陽川水注之水出南

陽雒縣西房陽川北流注于澁澁水之北有積石焉

世謂女靈山其山平地介立不連岡以成高峻石孤

峙不托勢以自遠四面壁絕極能靈舉遠望亭亭狀

若單楹插霄矣北面有如顏落劣得通步好事者時
有板陟耳澗水又與波水合水出霍陽西川大嶺東
谷俗謂之歇馬嶺川曰廣陽川非也即應劭所謂孤
山波水所出也馬融廣成頌曰浸以波澁其水又南
逕蠻城下蓋蠻別邑也俗謂之麻城非也波水又南
分三川于白亭東而俱南入澗水澗水自下兼波水
之通稱也是故闕駟有東北至定陵入汝之文全氏曰周
禮豫州其川榮洛其沒波澁康成師古皆不知波水
所在而以榮波之波當之後人或疑其非而以爾雅

洛出為波之波當之不知萊洛既為川矣不應復以其支流為沒也波水自當以出霍陽由澗入汝之波為是此可補澗水又東逕魯陽縣故城南城即劉累入周禮注中

之故邑也有魯山縣居其陽故因名焉王莽之魯山

也一清按今漢志無此文昔在于楚文子守之與韓構難戰有

返景之誠內有南陽都鄉正衛為碑諫釋跋曰祀魏正衛彈碑水經

作衛為靈帝中平二年立在汝州昆陽城中水經魯陽縣有南陽都鄉正衛為碑平氏縣有南陽都鄉正

衛彈劬碑此則其一也趙氏誤認衛為街遂云莫曉其為何碑于考其文則縣令寧陵君承昆陽喪亂之

餘愍繇役之害結單言府班董科例收其舊直臨時募顧不煩居民太守東郡王瓌丞濟陰華林優卹民

隱為之立約自是之後吏無苛擾之煩野無愁痛之聲其大略如此又云因民所利斯所謂惠康之策又有輕賦斂及役艱苦之語頌則美其輕賦均約蓋是紀述守今絲役條教也前書食貨志月為更卒已復為正注云更卒謂給郡縣一月而更者正卒謂給中都官者衛宏漢官舊儀民年二十三為正一歲為衛士一歲為材官習射御騎馳戰陣又云民給正衛材官年五十六老衰乃得免為民酸棗令劉熊碑云愍念丞民勞苦不均為作正彈造設門更此云都鄉正衛彈者與劉君碑同因學紀間曰周禮里宰以歲時合耦于坳注云坳者里宰治處也若今街彈之室於此合耦使佐助疏謂漢時在街置室檢彈一里之民金石錄有中平二年正月都鄉正衛彈碑在昆陽城中趙明誠失于攷禮注而鄒氏注水經洪氏棟釋皆以街為衛又誤矣漢書食貨志言古制云春將出民里昏平旦坐于右塾鄰長坐于左塾畢出然後歸夕

亦如之里昏之塾其即里宰所謂耒耨者與續金石錄云周禮里宰合耦于耒鄭玄謂耦者里宰治處也若今街彈之室疏云漢時在街置室檢彈一里之民於此水經建寧三年改新豐為都鄉而百官志凡州所監為都鄉者都邑之鄉若今之闕廂也故鄉曰某鄉而都鄉則無地名封爵有都鄉侯在闕內侯之上正者漢官舊儀云民年二十三為正一歲以為衛士一歲為材官騎士前漢食貨志月為更卒已復為正師古曰更卒給郡縣一月而更正卒謂給中都官者此都鄉之正也周禮于鋤合耦以勸農漢人于街彈之室糾彈不法昆陽當亂長之餘徭役煩苦郡守縣令班董科條收其舊直臨時顧募不煩居民立碑于街彈公所以頌其德也洪氏云趙氏誤認衛字為街改名街彈碑亦引衛宏漢官舊儀為證無論街彈見于註疏若衛士乃正卒一歲以後所遷之名又一歲為材官騎士百官志註云凡八月都尉今長相丞尉

謀設殿最非若正卒亭長之所得糾彈也况去士字似不成語予意仍題街彈為得洪氏碑目云水經作衛為趙作街彈按水經魯陽縣有南陽都鄉正衛為碑衛為似人姓名在魯陽非昆陽也如以衛字屬之上大則為碑二字題額又何說乎又引劉熊碑愍念蒸民勞苦不均為作正彈按三國志吳張淑為司直表正彈曲二十人專司不法與劉碑之正彈同非此碑之正係卒夫之名也况洪之所辨乃衛字若引劉碑則正彈連合又何闕涉乎庖林曰水經注魯陽縣有南陽都鄉正衛為碑平氏縣有南陽都鄉正衛彈勸碑衛之與街豈可強附者按鄭玄駁許慎異義曰周禮六十五皆征之使為胥徒給公家之事如今之正衛耳又張晏漢書註曰監門里正衛也正衛自是漢魏微官秩若封人任同里宰不得以解街彈之室也

潢水右合魯陽關水水出魯陽關外分頭山橫嶺下

夾谷東北出入潢潢水又東北合牛蘭水水發縣北

牛蘭山東南逕魯陽城東水側有漢陽侯焦立碑牛

蘭水又東南與柏樹谿水合水出魯山北峽谷中東

南流逕魯山西而南合牛蘭水又東南逕魯山南關

關曰魯陽縣今其地魯山是也水南注于潢潢水東

逕應城南故應鄉也應侯之國詩所謂應侯順德者

也彭水注之俗謂之小潢水水出魯陽縣南彭山蟻

塢東麓北流逕彭山西下有彭山廟廟前有彭山碑

漢桓帝元嘉三年杜仲長立

一清按范史桓帝紀元嘉紀元僅二年至明年

夏五月改元曰永興不得云三年也或碑以彭水逕春立未改元之先此與成陽靈臺碑正同

其西北漢安邑長尹儉墓東家西有石廟廟前有兩

石闕闕東有碑闕南有二獅子相對南有石碣二枚

石柱西南有兩石羊中平四年立彭水又東北流直

應城南而入澶澶水又左合橋水水出魯陽縣北恃

山東南逕應山北又南逕應城西地理志曰故父城

縣之應鄉也周武王封其弟為侯國應幼曰韓詩外傳稱周武王與弟戲以桐葉為圭曰吾以封汝周公

曰天子無戲言王乃應時而封故曰應侯鄉亦曰應

鄉按呂氏春秋云成王以桐葉為圭封叔虞非應侯

也汲郡古文殷時已有應國非成王矣

一清按呂氏春秋以下是

臣瓚說見漢志注師古曰武王之弟自封應國非桐圭之事應氏之說蓋失之焉又據左氏傳云邾晉應韓武之穆也則應侯武戰國范睢所封邑也謂之應王之子又與志說不同

水滄水又東逕犂縣故城北左傳昭公元年冬楚公

子園使伯州犁城犂是也出于魚齒山下春秋襄公
十八年楚伐鄭次于魚陵涉于魚齒之下甚雨楚師
多凍徒役幾盡晉人間有楚師師曠曰不害吾驟歌
北風又歌南風南風不競多死聲楚必無功矣所涉
即涇水也水南有漢中常侍長樂太僕吉成侯州苞
冢冢前有碑墓西枕岡城開四門門有兩石獸墳傾
墓毀碑獸淪移人有掘出一獸猶全不破甚高壯頭
去地減一丈許作制甚工左膊上刻作辟邪字門表

輦上起石橋歷時不毀其碑云六帝四后是詔是詎
蓋任安帝沒于桓后于時閹閹擅權五侯暴世割利
公私以事生死夫封者表有德碑者頌有功自非此

徒何用許為石至千春不若速朽芑摹萬古祇彰誚

辱嗚呼愚亦甚矣

金石錄跋尾曰吉成侯州輔碑名
字已殘闕其額題云漢故中常侍

長樂太僕吉成侯州君之銘輔姓名見范爽後漢書
宦者傳以定策立桓帝與曹騰等七人同時封為亭
侯今此碑載當時詔書有云其封輔為葉吉成侯以
此知其名輔而鄙道元注水經云澧水南有漢中常
侍長樂太僕吉成侯州芑冢冢前有碑其辭云六帝
四后是詔是詎今驗其詔文實有此語獨以輔為芑

蓋水經之誤當取漢史及此碑為正一清按輔碑載
棘釋其碑闕姓與字輔字無殘闕趙德甫云名字殘
闕蓋榻本未善耳碑文云特以才明敏達拜小黃門
遷事和熹后孝安思皇后時為大宮令孝順皇帝踐
阼復拜小黃門遷臧府令當拜中常侍讓與同郡錡
任後以病孫位起家復拜謁者令中尚方令遷中常
侍遭順帝棄天下扶佐孝冲孝實帝兼領黃門令順
烈皇后攝政拜長樂太僕遭孝質無嗣乃定冊帷幕
援立聖主有定社稷之勲建和二年七月己巳封為
葉吉成侯和平中復拜大長秋永壽二年十二月丙
子薨其銘詞所謂六帝四后是詔其諷者也洪氏曰
葉吉成者葉縣之吉成亭也又碑陰有故京兆尹延
篤叔堅名字洪氏曰州輔碑目自漢陽太守而下四
十有九人其人稱邑曰冠軍曰宛曰章陵曰新野曰
比陽曰魯陽皆南陽之邑也餘人惟延篤有傳乃南
陽隼人則不稱邑者隼之人也碑云鄉人姻族相與

刊石則又知輔為犍縣人也又金石錄跋尾云余初得州君墓碑又覽水經所載意此字猶存會故人董之明守官汝潁間因托訪求之持以見寄其一辟邪道元所見也其一乃天祿字差大皆完好可喜之明又云天祿近歲為村民所毀辟邪雖存然字畫已殘闕難辨

潢水又東犍水注之

俗謂之秋水非也水有二源東源出其縣西南踐犢

山東崖下水方五十許步不測其深東北流逕犍縣

南又東北屈逕其縣東而北合西流水西源出縣西

南頗山北阜下東北逕犍城西又屈逕其縣北東合

二水亂流北注于潢漢高祖入闔破南陽太守呂齮

於犢東卽于是地潢水之陰也潢水又東南逕昆陽縣故城北昔漢光武與王尋王邑戰于昆陽敗之走者相騰踐奔殪百餘里會大雨如注潢川盛溢虎豹皆股戰士卒爭赴溺死者以萬數水為不流王邑嚴尤陳茂輕騎皆乘尸而渡矣

東北過潁川定陵縣西北又東過鄆縣南東入于汝
潢水東逕西不羹亭南亭北背汝水於定陵城北東
入汝鄆縣在南不得過

清水出弘農盧氏縣攻離山東南過南陽西鄂縣西北又

東過宛縣南

一清按漢志弘農郡盧氏縣下云熊耳山右有清水南至順陽入沔考鄴注以均水

當之其出弘農盧氏縣攻離山之清水方輿紀要云俗名白河逕內鄉縣東逕又東南流至南陽府城東繞城南而達于新野縣府境諸水悉會焉又南至光化縣東北又東逕故鄧城東南而入于漢水地理志亦云南陽郡縣育水出西北南入漢與道元注正同二水源流既不相甚遠而名稱又復相似故詳辨之如此

清水導源弘農東流逕鄴縣故城北郭仲產曰鄴縣故

城在攻離山東鄴舊縣也三倉曰樊鄴鄴有二城

北鄴也漢祖入關下浙鄴即此縣也清水又東南流

歷雒縣之雒衡山東逕百章郭北又東魯陽關水注
之水出魯陽縣南分水嶺南水自嶺南流北水從嶺
北注故世俗謂此嶺為分頭也其水南流逕魯陽關
左右連山插漢秀木干雲是以張景陽詩云朝登魯
陽關峽路峭且深亦司馬芝與母過賊處也關水歷
雒衡山西南逕皇后城西建武元年世祖遣侍中傅
俊持節迎光烈皇后於滎陽俊發兵三百餘人宿衛
皇后道路歸京師蓋祝舍所在故城得其名矣山有

石室甚飾潔相傳名皇后浴室又所幸也關水又西
南逕雉縣故城南昔秦文公之世有伯陽者逢二童

曰雷曰被兩童二雉也得雌者霸雄者王二童翬飛

化為雙雉

一清按史記索隱引列異傳曰陳倉人得異物以獻之道遇二童子云此名為媚在

地下食死人腦媚乃言曰彼童子名陳寶得雄者王
得雌者霸宋書符瑞志媚作媪晏公類要引此注是

音與被乃兩童子名
可與郊祀志互証
光武獲雉於此山以為中興之

祥故置縣以名焉

一清按漢志南陽郡雉縣師古曰舊讀雉音弋兩反而太康地志云

即陳倉人所逐二童子名寶雖者雌止陳倉為石雉
止此縣故名雉縣疑不可據也顏說是也蓋雉縣西

京已有之是注云光武中興置關水又屈而東南流
縣亦非搜神記以為秦縣得之

注于清清水又東南流逕博望縣故城東郭仲產曰

在郡東北一百二十里漢武帝置校尉張騫隨大將

軍衛青西征為軍前導相望水草得以不乏元光六

年封騫為侯國地理志曰南陽有博望縣王莽改之

曰宜樂也清清水又東南逕西鄂縣故城東應劭曰江

夏有鄂故加西也昔劉表之攻杜子緒於西鄂也功

曹柏孝長聞戰鼓之音懼而閉戶蒙被自覆漸登城

而觀言勇可習也涓水又南潁水注之水出弘農郡
盧氏縣之熊耳山東南逕鄴縣北東南逕房陽城北

漢哀帝四年封南陽太守滌寵為侯國

一清按漢表
作方陽云在

龍俗謂之房陽川又逕西鄂縣南水北有張平子墓

墓之東側墳有平子碑文字悉是古文篆額是崔瑗

之辭盛宏之郭仲產並云夏侯孝若為郡薄其文復

刊碑陰為銘然碑陰二銘乃是崔子玉及陳翕耳而

非孝若悉是隸字二首並存嘗無毀壞又言墓次有

二碑今唯見一碑或是余夏景驛途疲而莫究矣清

按隸釋跋曰世所傳凡百君子者即平子冢碑其石已中斷合向城後碑始能成文此刻有夏侯湛姓名而云書之碑側蓋鄗氏考之不詳又金石文有河間相張平子碑具載其辭趙明誠金石錄亦有之此即崔瑗之作隸釋載孝若之文而水南道側有二石樓略子玉之撰蓋搜錄之漏也

相去六七丈雙跼齊竦高可丈七八柱圓圍二丈有

餘石質青綠光可以鑒其上樂檻承拱雕簷四柱窮

巧綺刻妙絕人工題言蜀郡太守姓王字子雅南陽

西鄂人

一清按樂史云是北齊時人恐非

有三女無男而家累千金

父沒當葬女自相謂曰先君生我姊妹無男兄弟今當安神元宅翳靈后土冥冥絕後何以彰吾君之德各出錢五百萬一女築墓二女建樓以表孝思銘云墓樓東平林下近墳墓而不能測其處所矣泚水又東南注于清水世謂之肄水肄泚聲相近非也地理志曰熊耳之山出三水泚水其一焉東南至魯陽入泚是也

一清按三水謂伊水育水即水經之均水也又有泚水漢志云過郡二行六百里師古曰

泚音耳過郡二謂弘農及南陽也

泚水又南逕預山東山上有神廟

俗名之為獨山也山南有魏車騎將軍黃權夫妻二
冢地道潛通其冢前有四碑其二魏明帝立二是其
子及臣吏所樹者也清水又西南逕史定伯碑南又
西為瓜里津水上有三梁謂之瓜里渡自宛道途東
出赭陽西道方城建武三年世祖自赭陽西入破虜
將軍鄧奉怨漢掠新野拒瓜里上親搏戰降之夕陽
下遂斬奉郡國志所謂宛有瓜里津夕陽聚者也阻
橋即桓溫故壘處溫以升平五年與范汪聚軍北討

列營涓水又西南逕晉蜀郡太守鄧義山墓南又南
逕宛城東其地故申伯之都楚文王滅申以為縣也
秦昭襄王使白起為將伐楚取郢即以此地為南陽
郡改縣曰宛王莽更名郡曰前隊縣曰南陽劉善曰
在中國之南而居陽地故以為名大城西南隅即古
宛城也荊州刺史治故亦謂之荊州城今南陽郡治
大城其東城內有舊殿基周二百步高八尺陞階皆
砌以青石大城西北隅有殿基周一百步高五尺蓋

更始所起也城西三里有古臺高五丈餘文帝黃初
中南巡行所築也消水又屈而逕其縣南故南都賦
所言消水蕩其胸者也王莽地皇二年朱鮪等共于
城南會諸將設壇燔燎立聖公為天子於斯水上世
語曰張繡反公與戰敗于昂不能騎進馬於公而昂
遇害魏書曰公南征至宛臨消水祠陣亡將士歔歔
流涕衆皆哀慟消水又南梅谿水注之水出縣北紫
山南逕百里奚故宅奚宛人也於秦為賢大夫所謂

迷虞智秦者也梅谿又逕宛西呂城東史記曰呂尚
先祖為四岳佐禹治水有功虞夏之際受封于呂故
因氏為呂尚也徐廣史記音義曰呂在宛縣高后四
年封昆弟子呂忿為呂城侯疑卽此也又按新蔡縣
有大呂小呂亭而未知所自也梅谿又南逕杜衍縣
東故城在西漢高帝七年封郎中王翳為侯國王莽
更之曰閔衍矣土地藝下湍谿是注古人於安衆塢
之今遊水是湑謂之安衆港世祖建武三年上自宛

遣潁陽侯祭遵西擊鄧奉弟終破之于杜衍進兵涇陽者也梅谿又南謂之石橋水又謂之汝谿合流而左注清水清水之南又有南就聚郡國志所謂南陽宛縣有南就聚者也郭仲產言宛城南三十里有一城甚卑小相承名三公城漢時鄧禹等歸鄉餞離處也盛宏之著荊州記以為三公置余棄清水左右舊有二澁所謂南澁北澁者水側之澁

一清按漢志南陽郡宛有北澁

山背陽有南澁聚諸儒或以為邑或以為地或以為水際及邊地名而班固以為山聚在涓陽

之東北考古推地則近矣城側有范蠡祠蠡宛人祠
即故宅也後漢未有范曾字子閔為大將軍司馬討
黃巾賊至此祠為蠡立碑文勒可尋夏侯湛之為南
陽又為立廟焉城東有大將軍何進故宅城西有孔
嵩舊居嵩字仲山宛人與山陽范式有斷金契貧無
養親賃為阿街卒一清按阿街卒古之所謂鬻唱唐
人謂之籠街唱道阿與呵通用而
范史范式傳作阿里街卒章懷
注云阿里里名也是又不同遣迎式式下車把臂
曰子懷道卒伍不亦痛乎嵩曰侯嬴賤役晨門卑下

之位古人所不耻何痛之有故其讚曰仲山通達卷
舒無方屈身廝役挺秀含芳

又屈南過清陽縣東

清水又南入縣逕小長安司馬彪郡國志曰縣有小
長安聚謝沈後漢書稱光武攻育陽不下引兵欲攻
宛至小長安與甄阜戰敗于此清水又西南逕其縣

故城南桓帝延熹七年封鄧康為侯國

沈氏曰康封
泚陽其弟秉

封清陽縣故南陽典農治後以為清陽郡省郡復縣避

晉簡文諱更名云陽焉清水又逕安樂郡北漢桓帝

建和六年封司徒胡廣為涑陽縣安樂鄉侯

沈氏曰
是元年

今於其國立樂宅戍郭仲產襄陽記曰南陽城南九

十里有晉尚書令樂廣故宅廣字彥輔也善清言見

重當時成都王廣女皆長沙王猜之廣曰寧以一女

而易五男猶疑之終以憂殞其故居今置戍因以為

名

又南過新野縣西

涓水又南入新野縣枝津分派東南出苞隰行注左
積為陂東西九里南北一十五里陂水所溉咸為良
沃涓水又南與湍水會又南逕新野縣故城西世祖
之敗小長安也姁元遇害上即位感悼妃沒追謚元

為新野節義長公主即此邑也晉咸寧二年封大司
馬扶風武王少子敬為新野郡公割南陽伍屬棘陽

蔡陽穰鄧山都封焉王文舒更立中隔

一清按下有
脫文三國志

魏書王昶傳昶以為國有常衆戰無常勝地有常險
守無常勢今屯宛去襄陽三百餘里諸軍嚴屯船在

宣池有急不足相赴乃表徙治新西即郡治東則民野丈舒昶字此即更立之事也

居城西傍消水又東與朝水合水出西北赤石山而

東南逕冠軍縣界地名沙渠又東南逕穰縣故城南

楚別邑也秦拔郢郢即以為縣秦昭王封相魏冉為

侯邑王莽更名曰農穰也魏荊州刺史治朝水又東

南分為二水一水枝分東北為樊氏陂陂東西十里

南北五里俗謂之允亭陂陂東有樊氏故宅樊氏既

滅庾氏取其陂故疇曰陂汪汪下田良樊子失業庾

公昌昔在晉世杜預繼信臣之業復六門之陂過六

門之水

一清按信臣所開者只石碣耳至元始五年史開三門為六石門今注云云直似六門皆

信臣所開矣誤也

下結二十九陂諸陂散流咸入朝水事見

六門碑六門既陂諸陂遂斷朝水又東逕朝陽縣故

城北而東南注于涓水又東南與棘水合水上承赭

水赭水出赭陽縣北山數源並發南流逕小赭鄉謂

之小赭水世祖建武三年成安侯臧宮從上擊赭鄉

東源方七八步騰湧若沸故世名之騰沸水南流逕

于赭鄉謂之赭水建武二年祭遵引兵南擊董訢于赭鄉以水氏縣故有赭陽之名也地理志曰縣有赭

水

一清按今漢志無是文

王莽曰陽城也漢哀帝改為順陽

全氏

曰按漢志云博山哀帝置故順陽非赭陽也道元于均水篇已言之建武二年更封安

陽侯朱祐為赭陽侯赭水於縣竭以為陂東西夾岡

水相去五六里左右合斷岡兩舌都水潭漲南北一

十餘里水決南瀆下注為灣灣分為二西為赭水東

為榮源赭水參差流結兩湖故有東陂西陂之名二

陂所導其分枝分東南至會口入泚是以地理志云

泚水赭水皆言入蔡

全氏曰按漢志無赭水入蔡語即此水入蔡亦是應勿說互

受通稱故也二湖流注合為黃水唯所受焉逕棘陽

縣之黃淳聚又謂之為黃淳水者也謝沈後漢書甄

阜等敗光武于小長安東乘勝南渡黃淳水前營背

阻兩川謂臨泚水絕後橋示無遂心漢兵擊之三軍

潰溺死黃淳水者二萬人又東逕棘陽縣故城西應

劭曰縣在棘水之陽是知斯水為棘水也漢高帝七

年封杜得臣為侯國後漢兵起擊唐子卿殺湖陽尉
進拔棘陽鄧晨將賓客會先武於此縣也棘水又南
逕新野縣歷黃郵聚世祖建武三年傅俊岑彭進擊
秦豐先拔黃郵者也謂之黃郵水大司馬吳漢破秦
豐於斯水之上其衆落悉為蠻居猶名之為黃郵蠻
棘水自新野縣東而南流入于涪水謂之為力口也
棘力聲相近當為棘口也又是方俗之音故字從讀
變若世以棘子木為力子木也涪水又東南逕士林

東戌名也戌有邨閭水左有豫章大陂下灌良疇三千許頃也

南過鄧縣東

縣故鄧侯吾離之國也楚文王滅之秦以為縣涓水右合濁水俗謂之弱溝水水上承白水於朝陽縣東南流逕鄧縣故城南習鑿齒襄陽記曰楚王至鄧之濁水去襄陽二十里即此水也濁水又東逕鄧塞南即鄧城東南小山也先後名之為鄧塞昔孫文臺破

黃祖于其下濁水東流注于涓涓水又南逕鄆塞東
又逕鄆城東古鄆子國也蓋鄆之南鄆也昔巴子請
楚與鄆為好鄆人奪其幣即是邑也司馬彪以為鄆
之鄆聚矣

南入于沔

瀝水出瀝強縣南澤中東入潁

瀝水出潁川陽城縣少室山東流注于潁水而亂流
東南逕臨潁縣西北小瀝水出焉東逕臨潁縣故城

北瀝水又東逕瀝陽城北又東逕瀝強縣故城南建

武元年世祖封揚化將軍堅錚為侯國

沈氏曰據本傳是二年

瀝水東為陶樞陂余案瀝陽城在瀝水南然則此城正應為瀝陰城而有瀝陽之名者明在南猶有瀝水故此城以陽為名矣潁水之南有二瀆其南瀆東南流歷臨潁亭西東南入汝今無水也疑即瀝水之故瀆矣汝水於奇額城西別東派時人謂之大瀝水東北流枝瀆右出世謂之死汝也別汝又東北逕名陵

城北練溝出焉別汝又東汾溝出焉別汝又東逕征

羌城北水南有汾陂俗音糞

一清按三字注中注

汾水自別汝

東注而為此陂水積征羌城北四五里方三十里許

瀆左合小瀍水水上承狼陂南流名曰鞏水青陵陂

水自陂東注之東迴又謂之小瀍水而南流注于大

瀍水大瀍水取稱蓋藉瀍沿注而總受其目矣又東

逕西華縣故城南又東逕汝陽縣故城北東注于潁

濯水出汝南吳房縣西北與山東過其縣北入于汝

縣西北有堂谿城故房子國春秋定公五年吳王闔閭弟夫槩奔楚封之于堂谿故曰吳房也漢高帝八

年封莊侯楊武為侯國建武中世祖封泗水王飲子

煇為堂谿侯

一清按韋懷後漢書注曰煇字林云灼也音光善反或作煇

山谿有

白羊淵淵水舊出白羊漢武帝元封二年白羊出此

淵畜牧者禱祀之俗禁拍手嘗有羊出水野母驚扑

自此絕焉淵水下合濯水濯水東逕濯陽縣故城西

東流入瀨水亂流逕其縣南世祖建武元年封吳漢

孫旦為侯國

沈氏曰吳漢三孫皆以建武二十八年封吳旦吳盱吳國也而水經注皆以為

元年其水又東入於汝水

瀨水出漁陰縣東上界山

山海經謂之視水也郭景純注或曰視宜為瀨出歲

山許慎云出中陽山

一清按漢志作中陰山方輿紀要云中陽山在唐縣東七十里

一名慈丘山隋因此置慈丘縣 皆山之殊目也而東與泌水合水出

漁陰縣早山東北流注瀨瀨水又東北殺水出西南

大熱之山東北流入于瀨瀨水又東淪水注之水出

宣山東南流注瀕水瀕水又東得奧水口水西出奧
山東入于瀕水也

東過吳房縣南又東過濯陽縣南

應劭曰濯水出吳房縣東入瀕縣之西北即兩川之
交會也

又東過上蔡縣南東入汝

漁水出漁陰縣西北扶予山東過其縣南

山海經曰朝歌之山漁水出焉東南流注于滎經書

扶予者其山之異名乎榮水上承楮水東流左與西
遼水合又東東遼水注之俱導北山而南流注于榮
榮水又東北於灑陰縣北左會灑水之道稍西不出

其縣南其故城在山之陽漢光武建武中封岑彭為

侯國漢以為陽山縣

一清按是句
文義未詳

魏武與張繡戰于

宛馬名絕景為流矢所中公傷右臂引還灑陰即是
地也城之東有馬仁陂郭仲產曰陂在泚陽縣五十
里蓋地百頃其所周溉田萬頃隨年變種境無儉歲

陂水三周其隍故瀆自隍西南而會于泚濰水不得
復逕其南也且邑號濰陰故無出南之理出南則為
陽也非直不究又不思矣濰水又東北澧水注之水
出雉衡東山南逕建城東建當為卷字讀誤耳郡國
志云葉縣有卷城其水又東流入于葉陂水東北逕
于東山西西流入濰濰水之左即黃城山也有谿水
出黃城山東北逕方城郡國志曰葉縣有方城郭仲
產曰苦菜于東之間有小城名方城東臨谿水尋此

城致號之由當因山以表名也苦菜即黃城也及于東通為方城矣世謂之方城山水東流注澠水故地

理志曰南陽葉方城邑西有黃城山

全氏曰按漢志曰葉有長城號

曰方城未嘗云黃城也是注所引或別有一地是長埋志一清按寰宇記引此文出聖賢冢墓記

沮築溺耦耕之所有東流水則子路問津處尸子曰

楚狂接輿耕於方城蓋於此也盛宏之云葉東界有

故城始隸縣東至澠水逕泚陽界南北聯聯數百里

號為方城即此城之西隅其間相去六百里北面雖

無基棊皆連山相接而漢水流其南故屈完答齊桓
公云楚國方城以為城漢水以為池郡國志曰葉縣
有長城山曰方城指此城也漁水又東北歷漁陽縣
故城南漢高祖六年封樊噲為侯國也

又東過西平縣北

縣故柏國也春秋左傳所謂江黃道柏方睦於齊也
漢曰西平其西呂墟即西陵亭也西陵平帝故曰西
平漢宣帝甘露三年封丞相于定國為侯國

全氏曰
按本表

日臨 王莽更之曰新亭晉太康地志曰縣有龍泉水
淮 可以砥礪刀劍特堅利故有堅白之論矣是以龍泉
之劍為楚寶也縣出名金古有鐵官

又東過郾縣南

郾縣故城去此遠矣不得過

又東過定潁縣北東入于汝

漢安帝永初二年分汝南郡之上蔡縣置定潁縣延

光中以陽翟郭鎮為尚書今封潁侯即此邑也
一清按後

漢書鎮以誅闔景擁順帝封是永建元年不在延光年也延光乃安帝年號

湏水出蔡陽縣

湏水出縣東南大洪山山在隋郡之西南竟陵之東北磐基所跨廣圓一百餘里峰曰縣鈎處平原衆阜之中為諸嶺之秀山下有石門夾輶層峻巖高皆數百許仞入石門又得鍾乳穴穴上素崖壁立非人跡所及穴中多鍾乳凝膏下垂望齊水雪微津細液滴漚不斷幽穴潛遠行者不極窮深以穴內常有風藝

無能經久故也。澗水出于其陰，初流淺狹，遠乃廣厚，可以浮舟楫，巨川矣。時人以澗水所導，故亦謂之為澗山矣。澗水東北流，合石水，石水出大洪山東北流，注于澗，謂之小澗水。而亂流東北，逕上唐縣故城南。本蔡陽之上唐鄉，舊唐侯國。春秋定公三年，唐成公如楚，有兩肅與馬子常欲之，弗與，止之。三年，唐人竊馬而獻之，子常歸唐侯是也。澗水又東，均水注之。水出大洪山東北流，逕土山，北水出土山，又東北流入。

于湏水湏水又屈而東南流

東南過隋縣西

縣故隋國矣春秋左傳所謂漢東之國隋為大者也

楚滅之以為縣晉武帝太康中立為郡

金石文字記曰皇甫誕碑

隋字作隨虞世南孔子廟堂碑歐陽詢九成宮醴泉銘王知敬李衛公碑高宗李英公碑天后順臨碑于敬之華陽觀王先生碑裴淮少林寺碑皆然當日金石之文二字通用自司馬溫公作通鑑以後始壹用隋字而水經注湏水隨縣字作隋則知此自古人有省筆之法謂文帝始去走而為隋者未必然也

湏水出縣西北黃山南逕源西縣西又東南湏水入

焉澗水出桐柏山之陽呂忱曰水在義陽澗水東南

逕澗西縣西又東南流入于澆澆水又東南逕隋縣

故城西春秋魯莊公四年楚武王伐隋令尹闢祁莫

敖屈重除道梁澆軍臨于隋謂此水也水側有斷蛇

丘隋侯出而見大蛇中斷因舉而藥之故謂之斷蛇

丘後蛇銜明珠報德世謂之隋侯珠亦曰靈蛇珠丘

南有隋季良大夫池

朱氏謀埤笺曰左傳作季梁一清按季良音同通同二十一卷

渠水注扶溝縣袁梁碑其碑本作良是其證也其水又南與義井水合水出

隋城東南井泉嘗湧溢而津注冬夏不異相承謂之

義井下流合澁澁水又南流注于澗

全氏曰按澁水豫州浸康成師

古皆疑其地不應在豫然職方之地犬牙相錯荆州之浸為潁則知豫之澁亦其例也

澗水又

會于枝水水源亦出大洪山而東流注于澗澗水又

逕隋縣南隋城山北而東南注

又南過江夏安陸縣西

隋水出隋郡永陽縣東石龍山

全氏曰史記春申君說秦昭王云隨水右

環皆廣川大水山林谿谷不食之地小司馬曰今鄧州之西也

西北流南迴逕永陽

縣西歷橫尾山即禹貢之陪尾也

禹貢雖指曰傳云洛經熊耳伊經外

方准出桐柏經陪尾今安陸北有橫山即漢志所謂橫尾山古文以為陪尾者也元和志云陪尾山一名橫尾山在安陸縣北六十里淮水曷嘗經此傳謬禹導山至陪尾蓋實為泗水泗之與淮猶伊之與洛也水經注云博物志曰泗出陪尾隋志泗水縣有陪尾山今在縣東五十里閻百詩云周禮保章氏疏曰外方熊耳以至泗水陪尾屬搖光星實公彥實從春秋緯文來則漢人早作是解博物志固有所受之一清按鄴注泗水篇說引博物志之言則是注不應又引漢志以安陸之橫尾為陪尾豈非自相舛錯與卷末禹貢山水澤地 隋水又西南至安陸縣故城西故所在亦同此誤

鄧城也因岡為墉峻不假築瀆水會之又南逕石巖

山北昔張昌作亂於其下龍彩鳳以惑衆晉太安二年鎮南將軍劉宏遣牙門皮初與張昌戰于清水昌敗追斬于江溪即春秋左傳定公四年吳敗楚于柏舉從之及于清發蓋澗水之通稱矣澗水又東南流而右會富水出竟陵郡新市縣東北大陽山水有二源也大富水出山之陽南流而左合小富水水出山之東而南逕三王城東前漢末王匡王鳳王常所屯故謂之三王城城中有故碑文字闕落不可復識其

水屈而西南流右合大富水俗謂之大泌水也又西南流逕杜城西新市縣治也郡國志以為南新市也中山有新市故此加南分安陸立又王匡中興初舉兵於縣號曰新市兵者也富水又東南流于安陸界左合土山水世謂之章水水出土山南逕隋郡平林縣故城西俗謂之將陂城與新市接界故中興之始兵有新市平林之號又南流右入富水富水又東入於澗澗水又逕新城南永和五年晉大司馬桓溫築

澗水又會溫水溫水出竟陵之新陽縣東澤中口徑
二丈五尺堰岸重沙端淨可愛靖以察之則淵泉如
鏡聞人聲則揚湯奮發無所復見矣其熱可以燂雞
洪澗百餘步冷若寒泉東南流注于澗水又右得澗
水水出江夏郡之曲陵縣西北澗山東南流逕其縣
南縣治石澗故城城圓而不方東入安陸注于澗水
又東南入于夏

澗水又南分為二水東通瀉水西入于沔謂之澗口

也

水經注釋卷三十一